



Hampir keseluruhan **daerah Penampang lumpuh** akibat banjir sejak, kelmarin.

Daerah Penampang tenggelam

» 100,000 penduduk terjejas dilanda banjir susulan hujan sejak kelmarin



Angin kencang dan laut bergelora di kawasan perumahan atas air Tanjung Aru, Kota Kinabalu. (FOTO IZHARI ARIFFIN/BH)

Oleh Willie Jude Junaidi dan Vivi Olviana Najurus
bhnews@bh.com.my

Penampang

Hampir keseluruhan daerah ini lumpuh akibat banjir susulan hujan lebat sejak malam kelmarin, mengakibatkan kira-kira 100,000 penduduk terjejas.

Ia juga dianggap banjir terburuk melanda kawasan itu sejak 15 tahun lalu.

Selain pekan Donggongan yang dinaiki air sepenuhnya, sekurang-kurangnya 70 kampung turut terjejas berpunca daripada limpahan Sungai Moyog.

Antara kampung teruk terjejas ialah Dabak, Ramayah, Minintod, Nambazan, Babah, Dungkahang, Kambau, Kolopis, Tuavon, Kibabag, Limbanak dan Tanaki.

Paras sungai meningkat

Difahamkan, paras Sungai Moyog mula meningkat beberapa hari lalu, namun bertambah teruk berikutan hujan berterusan sejak Ahad.

Selain Penampang, hujan lebat melanda pantai barat Sabah turut mengakibatkan banjir di beberapa kawasan di Kota Kinabalu, Papar, Tuaran dan Kota Belud.

Ketua Menteri, Datuk Seri Musa Aman, mengarahkan jabatan dan agensi berkaitan bersiap sedia berikutan hujan lebat berterusan di pantai barat Sabah.

“Semua agensi berkaitan perlu sentiasa memantau keadaan dan bertindak segera jika berlaku tanah runtuh atau banjir.

“Jawatankuasa bencana alam di semua peringkat juga sedia menghadapi sebarang kemungkinan di kawasan masing-masing,” katanya di sini, semalam.

Pegawai Daerah Penampang, William Sampil, berkata banjir semalam adalah yang terburuk



“**Banjir semalam adalah yang terburuk sejak tahun 1999 dengan hampir dua pertiga daripada 160,000 penduduk terjejas**”

William Sampil,
Pegawai Daerah Penampang

sejak tahun 1999 dengan hampir dua pertiga daripada 160,000 penduduk terjejas.

“Banjir mula pulih tengah hari tadi (semalam), namun sejumlah penduduk terperangkap atau tidak dapat keluar dari rumah berikutan jalan masih dinaiki air.

Tiada mangsa dipindah

“Tiada mangsa dipindahkan, namun jawatankuasa bencana alam daerah dengan kerjasama agensi lain, termasuk Jabatan Bomba dan Penyelamat, Jabatan Pertahanan Awam Malaysia (JPAM) serta polis terus membuat pemantauan,” katanya.

Penduduk Kampung Dabak, Brendan Lojuyuh, 35, berkata air naik dengan cepat di sekitar kampung itu mulai jam 6 pagi.

Katanya, kampung berkenaan sering dinaiki air setiap kali hujan lebat berikutan kedudukannya berhampiran Sungai Moyog.

Ketua Pusat Gerakan Operasi (PGO) JBPM Sabah, Mohd Afendy K Ramin, berkata 22 anggota terbabit dalam operasi sekitar Penampang, semalam.

“Pusat pemindahan banjir dibuka di Dewan Masyarakat Tun Fuad Stephens, namun sehingga petang tadi (semalam) belum ada laporan mangsa dipindahkan,” katanya.

Peperiksaan semula UPSR tak terjejas

Penampang: Jabatan Pendidikan Sabah mengenal pasti beberapa kaedah bagi memastikan peperiksaan semula kertas Matematik bagi Ujian Penilaian Sekolah Rendah (UPSR) esok di beberapa sekolah yang terjejas banjir, berjalan lancar.

Pengarahnya, Datuk Jame Alip, berkata setakat petang semalam, 18 sekolah, termasuk 17 sekolah rendah di empat daerah di negeri ini, ditutup akibat banjir susulan hujan lebat di pantai barat Sabah sejak beberapa hari lalu.

“Jika banjir belum pulih di

sesuatu sekolah, pihak sekolah dan Pejabat Pendidikan Daerah (PPD) akan mencari lokasi lain yang sesuai untuk membolehkan peperiksaan semula kertas Matematik diadakan.

Bomba bantu

“Jika jalan terputus hubungan sehingga kertas soalan tidak dapat dihantar ke pusat peperiksaan, kita akan meminta kerjasama Jabatan Bomba dan Penyelamat dan agensi berkaitan lain untuk memastikan kertas soalan dapat dihantar.

“Setakat petang ini (sema-

lam), banjir dikesan semakin pulih dan kita akan lihat langkah yang perlu diambil esok (hari ini),” katanya ketika dihubungi di sini, semalam.

Jame berkata, banjir di beberapa daerah semalam menyebabkan lebih 10,000 murid dan pelajar terjejas, khususnya di Penampang yang mengalami banjir terburuk.

“Daripada 18 sekolah yang terpaksa ditutup akibat banjir, tujuh adalah di Penampang, enam di Kota Kinabalu, empat di Papar dan satu di Kota Belud,” katanya.



Kampung Dabak berhampiran Sekolah Menengah Kebangsaan St Michael, Penampang turut ditenggelami air. (FOTO ROY GOH/BH)